

# Kalaallit Nunaannut nunatsinnilu angalanermi piumasaqaatit pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliuitsit pillugit Inatsisartut peqqussutaanni nr. 20 12. november 2001-imeersumi, Inatsisartut inatsisaanni nr. 1, 1. april 2020-meersutigut allanggortinneqartumi, §§ 2 a, 6, 6 a, 12 a, 12 b, 12 c, 21 a aamma 21 b aamma § 29 imm. 2 aamma imm. 3 naapertorlugit aalajangersarneqarpoq:

## *Atuuffia*

§ 1. Nalunaarut Kalaallit Nunaata avataaniit angalasunut nunattalu iluani angalasunut atuutissaaq.

## *Atuuffiata killilerneqarnera*

§ 2. Nalunaarummi matumani aalajangersakkat ilaat tamarmilluunniit inunnut inuiaqatigiinnut pingaarutilimmik sulialinnut atuutsinneqassanngitsut aalajangerneqarsinnaavoq.

*Imm. 2.* Inunnut Kalaallit Nunaanni Politiini sulisunut Kalaallit Nunaanni Politimesteri imm. 1 naapertorlugu aalajangiisassaaq.

*Imm. 3.* Inunnut Issittumi Sakkutooqarfimmi tassanilu immikkoortortaqarfimmi sulisunut Issittumi Sakkutooqarfimmi pisortaasoq imm. 1 naapertorlugu aalajangiisassaaq.

*Imm. 4.* Inunnut Peqqinnissaqarfimmi sulisunut Nunatta Nakorsaaneqarfia imm. 1 naapertorlugu aalajangiisassaaq.

*Imm. 5.* Inunnut imm. 2-4-mi taaneqanngitsuni sulisunut, Nunatta Nakorsaaneqarfia imm. 1 malillugu aalajangiisassaaq

*Imm. 6.* Nunatta Nakorsaaneqarfiaata nalunaarummi matumani aalajangersakkat ilaat tamaasaluunniit peqqinnissaqarfimmi katsorsarneqartunut imaluunniit, pissutsit allat peqqinnissakkut sulianut immikkut illuinnartut atuutsillugit, inunnut ataasiakkaanut atuutsinneqassanngitsut aalajangersinnaavaa.

*Imm. 7.* Inuit pinerluttunik isumaginnittoqarfimmit nakkutigineqartut Pinerluttunik isumaginnittoqarfimmi pisortaq § 6 imm. 1 malillugu immikkut akuersissuteqarsinnaavoq.

*Imm. 8.* Nalunaarut eqqartuussivinnut atuutinngilaq.

*Timmisartumi Kalaallit Nunaannukartussami ilaasunut piumasaqaatit*

§ 3. Angalasut marlunnik sinnerlugilluunniit ukiullit piumasaqaatini tulliuuttuni ataaseq naammassippassuk aatsaat timmisartumi Kalaallit Nunaannukartussami ilaasinnaatitaapput:

1) Inuit Kalaallit Nunaanni najugaqartut imm. 2 naapertorlugu najugaqassutsimut aammalu Covid-19-imik nappaateqannginnermut uppersaassapput.

2) Inuit Kalaallit Nunaanni najugaqanngitsut aamma aqqaneq marlunnik sinnerlugilluunniit ukiullit Covid-19-imut tamakkiisumik akiuussusertissimassapput tamatumunngalu uppersaammik aamma Covid-19-imik nappaateqannginnermut uppersaammik takutitsisnaassapput, Akiuussutissanik Europami nakorsaatinik nakkutilliisuniit, European Medicines Agencymit (EMA) akuerisaasunik akiuussusertinnerit taamaallaat akuerisaapput.

3) Inuit Kalaallit Nunaanni najugaqanngitsut marlunniit 11-illu akornanni ukiullit Covid-19-imik PCR atorlugu nappaateqannginnermut uppersaammik takutitsisassapput.

*Imm. 2.* Najugaqartut tassaapput inuit aalajangersimasumik nunatsinni najugaqartut, aalajangersimasumik najugaqalernissaq siunertaralugu maanga nuuttut kiisalu inuit maani nunami piffissami sivirusuuliartortut.

*Imm. 3.* Nunatsinnut angalasut inummut tunillatsissimasumut qanimut attaveqarsimanermi kingorna tunillatsinnissamut aarlerinartorsiorsimasutut najukkami oqartussanit ilisimatinneqartut Kalaallit Nunaannut aallannginnerminni timmisartumut ikitinnatik sapaatip akunnera ataaseq sioqqullugu Covid-19-imik nappaateqannginnermik uppersaatinik marlunnik tulleriinnik takutitsissapput. Misissortinneq siulleq tunillatsissimasumik attaveqareernerup kingorna ullut sisamat qaangiunnerani pissaaq. Misissortinnerup aappaa misissortinnerup siulliup kingorna ullut marluk qaangiunneranni pissaaq.

*Imm. 4.* Covid-19-mut PCR atorlugu tunillatsissimannginnermut uppersaasat, misissortittup aqqa, qanga misissortissimanerluni aamma misissuisoq pillugu ilisimatitsissutigineqassaaq. Misissortinneq napparsimmavimmi peqqissaavimmiluunniit assigisaanilu Nunat Avannarliit ilaanni, EU-mi, EØS-imi UK-miluunniit ingerlanneqarsimassaaq Kalaallillu Nunaannut aallarnermi ullut marluk (akunnerit 48 tiimit) sinnerlugit pisoqaassuseqassanngilaq.

*Imm. 5.* PCR atorlugu Covid-19-imut tunillatsissimannginnermut misiliut, Nunatta Nakorsaaneqarfianiit piumasaqaatit aalajangersakkat naammassissavai.

*Imm. 6.* Nunatta Nakorsaaneqarfia imm. 1-4-mit immikkut akuersissuteqarsinnaavoq.

*Imm. 7.* Imm. 1-ip maleruarneqarnissaata qulakkeernissaa angallassissummik piginnittup akisussaaffigaa.

*Umiarsuit umiarsuarnilu ilaasut Kalaallit Nunaannut tikittunut malittarisassat immikkut ittut atuuffi*

§ 4. Inuit umiarsuarni Kalaallit Nunaanni talittarfimmik tikittunut ilaasut nunamukartullu nalunaarummi §§ 11, 13 aamma 14 naapertorlugit nunamut tikittutut isigineqassapput, matumani umiarsuaq Kalaallit Nunaannut tikitsinnani ulluni kingullerni 14-ini nunami allami imaluunniit Danmarkimi imaluunniit Savalimmiuni talittarfimmik talissimappat arlaatigulluunniit sumiiffinnit taakkunanik inunnik ikisoqarsimappat.

*Imm. 2.* Inuit umiarsuarmut ilaasut umiarsuup Kalaallit Nunaanni tulaqqanerani nunaameersunik 2 meterit ataallugit qanitsigalutik attaveqateqassagunik § 10 naapertorlugu qanermut imaluunniit kiinnamut assiaquteqarnissaat piumasaqaataavoq.

*Imm. 3.* Umiarsuit nunatsinnukartigatik ulluni 14-ini kingullerni nunani allani, Danmarkimi, Savalimmiuniluunniit tulaqqasimannngippata allatulluunniit iliornikkut sumiiffinnit taakkunanik ilaasunik

ikiffigineqarsimangippata, taava inuit umiarsuarni ilaasut Covid-19-imik tunillanneqarsimangitsutut naatsorsuutigineqassapput, inulli nappaammut ersiuteqarpat tamanna naatsorsuutigineqassanngilaq. Umiarsuaq ilaasullu nunat tamalaat akornanni angalaartut pillugit aalajangersakkanut ilaatinneqarput.

§ 5. Umiarsuit ilaasartaatit, taakkununga ilanngullugit umiarsuit takornarianik angallassissutit, Danmarkimi Savalimmiuniluunniit tulaqqasimappata arlaatigulluunniit ilaasunik ikiffigineqarsimappata nunatsinnukartigatik ulluni kingullerni 14-ini nunat allat umiarsualiviini tulaqqasimappata Nunatsinnut tulassinnaanngillat. Inerteqqut nunap immikkoortuanut tamarmut atuuppoq, matumanilu imartamut, taamaattoq nunat tamalaat akornanni pisussaaffiit ataqqillugit. Oqaaseqatigiinni siullermi aappaanilu taaneqartup naammassinninnissaa angallatip piginnittuata akisussaaffigaa.

*Imm. 2.* Nunatsinni Nakorsaaneqarfik imm. 1-imik immikkut akuersissuteqarsinnaavoq.

*Imm. 3.* Imm. 1-imi inerteqqut apeqqutaatinnagu, imm. 2 naapertorlugu umiarsuarnut immikkut akuersissuteqanngitsunut inerteqqutaanngilaq:

1) Tulannermi teknikkitaq, matumani inuttat, ilaasut nunamut niunatik avataaneersunilluunniit ikisoqanngitsoq aamma

2) umiarsuarmi ajornartoornermi, motorip ajutoornerani, ikuallattoornermi assingusumilluunniit pinasuartumik pisoqarnerni tulakkasuarneq.

*Imm. 4.* Imm. 1 umiarsuarnut aalajangersimasumik aqquteqarlutik Nunatta umiarsualiviinut tulattartunut taakkunangalu avalattartunut atuutinngilaq.

#### *Nunap killeqarfiata iluani angalanermi piumasaqataatit*

§ 6. Inuit sumiiffinniit nunap killeqarfiata iluani illoqarfimmit/nunaqarfimmiit illoqarfimmut/nunaqarfimmut, Covid-19-imut tamakkiisumik akiuussuserneqarsimanermik imaluunniit Covid-19-imut tunillatsissimanginnermik uppersarsaammik takutitsisinnaassapput.

*Imm. 2.* Inuit tullinnguuttut makku imm. 1-imi piumasaqaatinut ilaatinneqanngillat:

1) Inuit marluk inorlugit ukiullit.

2) Inuit Covid-19-imut illoqarfinni nunaqarfinniluunniit aallannginnerminni misissortinnissamut periarfissaqanngitsut, taamaattoqli takuuk §§ 7,8 aamma 9.

3) Inuit nunatta iluani angalariarlutik nunatta avataanut ingerlaqqinnginnerminni akunnillutik meqqaartussat.

*Imm. 3.* Imm. 1-ip maleruarneqarnissaata qulakkeernissaa angallassissummik piginnittup akisussaaffigaa.

§ 7. Inuit § 6, imm. 2-mi nr. 2-mi pineqartut Covid-19-imik tunillanneqarsimanginnertik uppersarsaqaarnagu aqqissuussinernut, nalliuttorsiornermut, sammisaqartitsinerit assigisaannulluunniit peqataaqusaanngillat. Matumani illup iluani, silami, pisortat inuillu katersuuttarneri, aqqissuussinerit pisussallu il.il. pineqarput.

*Imm. 2.* Pisortat suliffeqarfutaanni assigisaanilu isersimanermut, inuit inatsisitigullu pisussaataasut pisinnaatitaasullu tamanut ammasuni isersimanermut aamma pisortat namminersortullu utoqqarnik paaqqinnittarfinut napparsimavinnulluunniit isersimanermut imm. 1-imi inerteqqut aamma atuutsinneqassaaq. Taamaattoqli qanermut kiinnamulluunniit assiaqutit atorlugit Covid-19-imut napparsimavinni misissortinnissaaq, ulluinnarni nioqqutissanik pisiniarnissaaq allallu pisariaqavissut allanit

isumagineqarsinnaangitsut isumaginissaat akuerineqarput.

*Imm. 3.* Peqataasut taamaallaat inoqtugiiuppata inissiamut imm. 1 atuutissanngilaq.

*Imm. 4.* Immikkoortut 1 aamma 2 katersuunnernut politikikkut allatulluunniit isummernissamik siunertalinnut atuutinnngillat.

**§ 8.** Inuit § 6, imm. 2-mi nr. 2 pineqartut tikiffissaminut tikereerunik Covid-19-imut misissortissinnaassapput, taamaattorli § 9 takuuk.

*Imm. 2.* Imm. 1-imi misissortinneq pineqartoq nappaateqannginnermik uppersaappat inuk pineqartoq Covid-19-imik tunillanneqarsimanngitsutut isigineqassaaq.

*Imm. 3.* Misissuinermi nappaammik nassaartoqarpat Nunatsinni Nakorsaaneqarfiup Peqqinnissaqarfullu innersuussutaat malinneqassapput.

*Imm. 4.* Inuk Covid-19-imik nappaammut misissortinnngippat § 7-mi inerteqqut Kalaallit Nunaannut tikinnermiit ulluni 14-imi atuutissaaq. Inuk Kalaallit Nunaannut tikinnermiit ullut 14-it sinnerlugit Covid-19-imik nappaateqarnermut ersiuteqarsimanngikkuni Covid-19-imik tunillanneqarsimanngitsutut naatsorsuutigineqassaaq.

**§ 9.** Inuit § 6, imm. 2, nr. 2-mi pineqartut, illoqarfinnut imaluunniit nunaqarfinnut tikittut, Covid-19-imullu misissortinnissamut periarfissaqanngitsut, § 7 naapertorlugu tikinnermiit ulluni 14-imi killilersuut atuuppoq.

*Imm. 2.* Angalasoq tikinnermiit ullut 14-it qaangernerini Covid-19-imik nappaateqarnermut ersiuteqarsimanngikkuni Covid-19-imik tunillanneqarsimanngitsutut naatsorsuutigineqassaaq.

#### *Qanermut imaluunniit kiinnamut assiaquteqarnissamut piumasaqaat*

**§ 10.** Angalasut aqqaneq-marluunniit ukiullit kiisalu saqisut timmisartumi umiarsuarmilu ingerlaartumi qanermut imaluunniit kiinnamut assiaquteqassapput. Piumasaqaatip maleruarnissaa angallatip piginnittuata akisussaaffigaa.

*Imm. 2.* Imm. 1-imi piumasaqaat inunnut angallassissummi ineeqqaniittunut assigisaaniittunulluunniit aammalu ilaasunut illoqatigisamik saniatigut ilaasunik allanik attaveqarsimanngitsunut atuutissanngilaq.

*Imm. 3.* Inuit tamarmik aqqaneq-marluunniit sinnerlugillu ukiullit mittarfinniittut, aallariartortarfinniittut/tikittarfinniittut assigisaanniittullu qanermut imaluunniit kiinnamut assiaquteqassapput. Piumasaqaatip maleruarnissaa inuup akisussaaffigaa.

*Imm. 4.* Pisiniarfinni kiffartuussivinnilu sulisut qanermut kiinnamulluunniit assiaqutit atunngikkaluarlugit pisiniat sulisullu akornanni plastikimik assiaqutit igalaajusut atorsinnaavaat. Piumasaqaatip maleruarnissaa sulisitsisup akisussaaffigaa.

*Imm. 5.* Qanermut imaluunniit kiinnamut assiaquteqarnissamut piumasaqaat ilisimassutsimik annikillimasunut, timikkut tarnikkulluunniit sanngiitsunut, allamilluunniit peqquteqarlutik qanermut kiinnamulluunniit assiaquteqarsinnaangitsunut atuutinnngilaq.

*Imm. 6.* Qanorluunniit immikkoortuni 1-imi 3-miluunniit allaqqasoqaralarpat, peqqutissaqaralarpat qanermut kiinnamulluunniit assiaqutit ilaannakortumik tamakkiisumilluunniit peeqqaneqarallarsinnaapput, assersuutigalugu:

1) Piffissami sivikitsumi nerinnermi imaluunniit imernermi, tamanna angallammi, mittarfiup illorsuartaanni

assigisaannilu inerteqqutaanngippat.

- 2) Nakorsaatornermi.
- 3) Qarngit aalaneratigut atuasartumik oqaloqateqarnermi.
- 4) Qanermut kiinnamulluunniit assiaqutit anersaartorniarnermut ajoqutaappata ipiannulersitsippataluunniit.
- 5) Politiit kinaassutsimik uppersaaneranni.

**§ 11.** Kalaallit Nunaannut angalasut aqqaneq-marlunnik sinnerlugillu ukiullit nunatsinnut tikinnerminnit qanermut kiinnamulluunniit assiaquteqartassapput:

- 1) timmisartoqarfimmiit, umiarsualivimmiit assigisaannilu pingaarnertut najugarisaminnut angalanerminni,
- 2) 2 meterit ataallugit innunat allanut qanitsigalutik pingaarnertut najugarisaminnit Covid-19-imut misissuivimmukarnerminni, aammalu
- 3) pingaarnertut najugarisami avataaniikkunik innunat allanut attaveqarfusuni 2 meterit ataallugit qanitsigissagunik.

*Imm. 2.* Qanermut kiinnamulluunniit assiaquteqarnissamut piumasaqaat inuup Covid-19-imik tunillatsissimangitsutut naatsorsuutigineqalernissaata tungaanut atuutissaaq, § 14, imm. 4 imaluunniit 6 takukkit. Piumasaqaat taanna § 15 naapertorlugu nunatsinnut angalasunut tamakkiisumik akiuussuserneqarsimasunut atuutinngilaq.

*Imm. 3.* Qanermut imaluunniit kiinnamut assiaquteqarnissamut piumasaqaat ilisimassutsimik annikillimasunut, timikkut tarnikkulluunniit sanngiitsunut, allamilluunniit peqquteqarlutik qanermut kiinnamulluunniit assiaquteqarsinnaanngitsunut atuutinngilaq.

*Imm. 4.* Qanorluunniit immikkoortuni 1-imi 2-miluunniit allaqqasoqaralarpat, peqqutissaqaralarpat qanermut kiinnamulluunniit assiaqutit ilaannakortumik tamakkiisumilluunniit peeqqaneqarallarsinnaapput, tamatumunnga ataani allaqqasut ilanngullugit:

- 1) Piffissami sivikitsumi nerinermi imaluunniit imernermi, tamanna angallammi, sumiiffimmi assigisaannilu inerteqqutaanngikkuni.
- 2) Nakorsaatornermi.
- 3) Qarngit aalaneratigut atuasartumik oqaloqateqarnermi.
- 4) Qanermut kiinnamulluunniit assiaqutit anersaartorniarnermut ajoqutaappata ipiannulersitsippataluunniit.
- 5) Politiit kinaassutsimik uppersaaneranni.

**§ 12.** Qanermut assiaqutit tassaapput qanermut qingamullu assiaqutit ataasiartakkat imaluunniit annoraaminermik sanaat allunaasamillu tasisartumilluunniit siutinut ikkuttartut imaluunniit niaqqup tunuatungaani qilertartut kiinnamullu attuumasut.

*Imm. 2.* Kiinnamut assiaqutit tassaapput isinut, qanermut qingamullu assiaqutit plastikimik sanaat kiinnamut attuumangitsut.

**§ 13.** Angalasut timmisartukkut Kalaallit Nunaannut tikittut Covid-19-imik tunillanneqarsimanginnertik uppernarsaqaarnagu aaqqissuussanut, nalliuttorsionernut, sammisaqartitsinernut assigisaanulluunniit peqataaqqusaanngillat. Matumani illup iluani, silami, pisortat inuillu katersuuttarneri, aaqqissuussinerit pisussallu il.il. ilaatinneqarput.

*Imm. 2.* Tamakkiisumik akiuussusertereersimasut uppernarsaammik takussutissamik tigummiagartut Covid-19-imik tunillatsissimangitsutut naatsorsuuneqassapput.

*Imm. 3.* Imm. 1-imi inerteqqut pisortat suliffeqarfutaanni assigisaanilu isersimanermut, inuit inatsisitigullu pisussaatitaasut pisinnaatitaasullu tamanut ammasuni isersimanermut aamma pisortat namminersortullu utoqqarnik paaqqinnittarfinut napparsimavinnulluunniit isersimanermut inerteqqut aamma atuutinneqassaaq. Taamaattorli qanermut kiinnamulluunniit assiaqutit atorlugit Covid-19-imut misissortinnissaq, ulluinnarni nioqqutissanik pisiniarnissaq allallu pisariaqavissut allanit isumagineqarsinnaanngitsut isumaginissaat akuerineqarput.

*Imm. 4.* Peqataasut taamaallaat inoqtigiiuppata imm. 1 inissiamut atuutissanngilaq.

*Imm. 5.* Immikkoortut 1 aamma 3 katersuunnernut politikikkut allatulluunniit isummersornissamik siunertalinnut atuutinngillat.

**§ 14.** Nunatsinnut angalasut Kalaallit Nunaannut tikereernerup kingorna ullut tallimassaanni kingusinnerusukkulluunniit Covid-19-imut misissortissinnaapput, taamaattorli imm. 2 aamma 3 takukkit.

*Imm. 2.* Nunatsinnut angalasut Covid-19-imut akiuussutissamik tamakkiisumik kapitissimasut Kalaallit Nunaannut tikinnermi kingorna misissortissanngillat. Taamaakkaluartoq angalasoq aperineqaruni akiuussutissamik kapitissimanini uppernarsassavaa. Angalasup akiuussutissamik kapitissimanini uppernarsarsinnaanngikkuniuk, angalasup inunntut akiuussutissamik kapitissimangitsunut malittarisassat maleruassavai.

*Imm. 3.* Meeqqat marluk inorlugit ukiullit piomasaaqammi imm. 1-imi aamma 6-imi ilaatinneqanngillat.

*Imm. 4.* Imm. 1-imi misissortinneq pineqartoq nappaateqannginnermik uppernarsaappat inuk pineqartoq Covid-19-imik tunillanneqarsimangitsutut isigineqassaaq.

*Imm. 5.* Misissuinnermi nappaammik nassaartoqarpat Nunatta Nakorsaaneqarfia Peqqinnissaqarfullu innersuussutaat malinneqassapput.

*Imm. 6.* Inuk Covid-19-imik nappaateqarnermut misissortinngippat § 13-mi inerteqqussut Kalaallit Nunaannut tikinnermiit ulluni 14-imi atuutissaaq. Inuk Kalaallit Nunaannut tikinnermiit ullut 14-it sinnerlugit Covid-19-imik nappaateqarnermut ersiuteqarsimangikkuni Covid-19-imik tunillanneqarsimangitsutut naatsorsuutigineqassaaq.

**§ 15.** Inuk Covid-19-imut tamakkiisumik akiuussuserneqarsimasutut isigineqassaaq inuup akiuussuserneqarsimanerup kingorna ullut 14-it qaangiunneranni tamanna uppernarsarsinnaappagu.

*Imm. 2.* Nunatta Nakorsaaneqarfia akiuussuserneqarsimanermut uppernarsaatit sorliit akuerisaanersut aalajangissavai.

*Pingaartumik inunntut Covid-19-imik siusinnerusukkut tunillatsinnikunut*

**§ 16.** Inunntut siusinnerusukkut Covid-19-imik tunillatsinnikuusimasunut PCR-ilu atorlugu misissortinnikkut Covid-19-imik tunillatsissimanerminnik uppernarsaasinnaasunut, piffissami

uppernarsaatip atorreqarnerani minnerpaamik ullunik 14-inik annerpaamillu sapaatit akunnerinik aqqaneq-marlunnik pisoqaassusilimmik uppernarsaasinnaasunut tamakkiisumik akiuussuserneqarsimasunut malittarisassat atuuttut assingi atuutsinneqarput.

*Imm. 2.* Inunnut siusinnerusukkut Covid-19-imik tunillatsinnikuusimasunut tikinnerminnilu PCR atorlugu misissortereernerikkut Covid-19-imik tunillatsissimanerminnillu minnerpaamik ulluni 14-ini annerpaamik sapaatit akunnerini 12-inik pisoqaassusilinnik uppernarsaasinnaasunut, Covid-19-imik nappaateqannginnermut uppernarsaanermik piunasaqaat atuutinngilaq.

*Imm. 3.* Uppernarsaat suna uppernarsaatitut akuerisatut atorreqassanersoq Nunatta Nakorsaaneqarfiata aalajangersinnaavaa.

**§ 17.** Covid-19-imut uppernarsaatitut akuerisaq PCR - imaluunniit antigentest atorlugu tunillatsissimannginnermut uppernarsaatitut paasineqassaaq, tamanna peqqinnissaqarfimmiit imaluunniit peqqinnissaqarfik sinnerlugu imaluunniit inuit inatsisitigullu pisussaataasut pisinnaatitaasullu Nunatta Nakorsaaneqarfianit akuersissummik tigusaqarnikumit misissorneqarsimassaaq, annerpaamillu 48 tiiminik pisoqaassuseqassalluni.

*Inuit pillugit paasissutissanik suliarinninnerit*

**§ 18.** Nalunaarut una naapertorlugu inuup akiuussuserneqarsimaneranut inissisimaffia uppernarsarniarlugu inuit pillugit paasissutissanik suliarinnittoqarsinnaavoq.

*Pineqaatissiissuteqartarnej*

**§ 19.** § 3, imm. 1 aamma 7, § 4, imm. 2 § 5, imm. 1, § 6, imm. 1 aamma 3, § 7, imm. 1 aamma 2, § 8, imm. 1, 3 aamma 4, § 9, § 10, imm. 1, 3 aamma 4, § 11, imm. 4, imm. 1 aamma § 13, imm. 1 aamma 3-mik unioqqutitsisoq pinerluttulerinermik inatsit malillugu pineqaatissinneqarsinnaavoq.

*Imm. 2.* Ingerlatseqatigiiffit il.il. (inatsisitigut pisussaataasut pisinnaatitaasullu) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

*Atuutilersitsinnermut atorunnaarsitsinermullu aalajangersakkat*

**§ 20.** Nalunaarut 5. januar 2021-mi atuutilissaaq.

*Imm. 2.* Nalunaarut malillugu killilersuinerit, inerteqquteqarnerit, peqqusinerit il.il. 5. apriliip 2022 ilanngullugu atuutissapput.

*Inatsimmi allami allannguutit*

**§ 21.** Kalaallit Nunaannut nunatsinnilu angalanermi piunasaqaatit pillugit Namminersorlutik Oqartussat nalunaarutaanni uku allanngortinneqarput:

1) § 21, imm. 3-mi "6. marts 2022"-mit "4. januar 2022"-mut allanngortinneqarpoq.

*Namminersorlutik Oqartussat, ulloq 4. januar 2022*

Kirsten Fencker  
Peqqinnissamut Naalakkersuisoq

/ Aka Olesen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut